



N°900
Entrée le 17.06.2024
Chambre des Députés
Déclarée recevable
Président de la Chambre des Députés
(s.) Claude Wiseler
Luxembourg, le 18.06.2024
Chambre des Députés

Claude WISELER
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 17/06/2024

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un d'Ministere fir Wunnengsbau & Bildung, Kanner a Jugend weiderzeleeden.

An der parlamentarescher Fro n°3235 vum August 2017 goufen eng Rei Froen zu der Zockersteuer an anere Länner gestallt souwéi och zu enger méiglecher Aféierung vun esou enger Zockersteuer hei zu Lëtzebuerg. An der deemoleger Äntwert huet et geheescht, dass et an 11 europäesche Länner schonn esou eng Steuer gëtt an a véier weidere Länner zu dem Ablack doriwwer diskutéiert gouf.

An deem Zesammenhang wéilt ech de Ministeren dës Froe stellen:

1. Leien dem Ministère offiziell Zuelen zum Konsum vun Zocker hei zu Lëtzebuerg vir? Wa jo, wéi ass de Konsum an der Moyenne pro Awunner a huet de Ministère Zuelen doriwwer, wéi vill Prozent vum Zocker vu Persounen ënner 18 Joer consomméiert ginn?
2. Wa jo, wat fir eng Conclusiounen zitt d'Ministesche aus dëse Statistiken?
3. An der Vergaangenheet gouf et och zu Lëtzebuerg scho Fuerderungen, fir entweder eng Zockersteuer anzeféieren, respektiv de Verkauf vu staark zockerhaltegem Gedrénks (Limonad, Jusen, etc.) an de schoulesche Strukture ganz ze verbidden. Verschidde Gedrénks, wéi zum Beispill Cola, dierfen a verschidde Gebaier schonn net méi verkaaft ginn. Jusen, déi zum Deel awer och en héijen Zockergehalt opweisen, dierfen awer nach ëmmer u Schüler:inne verkaaft ginn.

A wéi ville Schoulen a Lycéeën ginn hei am Land nach Softdrinks (Limonad, Jusen, etc.) verkaaft? No wéi enge Krittere gouf entscheet, wat fir Gedrénks nach dierf an de schoulesche Strukture verkaaft ginn a wéi eent net méi?
4. Op wéi ee Montant schätzt de Staat d'Ausgabe vun der Krankekeess all Joers fir d'Behandlung vu Krankheeten, déi an direktem Zesammenhang mat ze héijem Zockerkonsum stinn, wéi zum Beispill Typ-2-Diabetes?
5. Wéi huet d'Zuel vun de Länner, déi iwwer eng Zockersteuer verfügen, zënter 2017 evoluéiert a wéi eng Resultater goufen an dëse Länner domat erreecht?

Mat déiwem Respekt,



www.piraten.lu



CLEMENT Sven
Deputéierten





Gemeinsam Äntwert vun der Madamm Ministesch fir Gesondheet a sozial Sécherheet, vum Här Minister fir Educatioun, Kanner a Jugend a vum Här Finanzminister op d'parlamentaresch Fro n° 900 vum 17. Juni 2024 vum honorabelen Deputéierten Här Sven Clement.

1. Leien dem Ministère offiziell Zuelen zum Konsum vun Zocker hei zu Lëtzebuerg vir? Wa jo, wéi ass de Konsum an der Moyenne pro Awunner a huet de Ministère Zuelen doriwwer, wéi vill Prozent vum Zocker vu Persounen ënner 18 Joer consomméiert ginn?

2. Wa jo, wat fir eng Conclusiounen zitt d'Ministesch aus dëse Statistiken?

Dem Ministère fir Gesondheet a sozial Sécherheet leie keng Zuelen iwwert d'Zockerconsummatioun vu Persounen ënner 18 Joer vir.

3. An der Vergaangenheet gouf et och zu Lëtzebuerg scho Fuerderungen, fir entweder eng Zockersteuer anzeféieren, respektiv de Verkaf vu staark zockerhaltegem Gedrénks (Limonad, Jusen, etc.) an de schoulesche Strukture ganz ze verbidden. Verschidde Gedrénks, wéi zum Beispill Cola, dierfen a verschidde Gebaier schonn net méi verkaaf ginn. Jusen, déi zum Deel awer och en héijen Zockergehalt opweisen, dierfen awer nach ëmmer u Schüler:inne verkaaft ginn. A wéi ville Schoulen a Lycéeën ginn hei am Land nach Softdrinks (Limonad, Jusen, etc.) verkaf? No wéi enge Krittäre gouf entscheet, wat fir Gedrénks nach dierf an de schoulesche Strukture verkaaf ginn a wéi eent net méi?

An den ëffentleche Schoulen vum Enseignement fondamental gëtt kee Gedrénks verkaf.

An deene vu Restopolis geréierte Kantinnen a Cafeteriae ginn nëmmen déi Produkter verkaf, déi an dem Arrêté ministériel festgehal gi sinn. Wann d'Schoulcommunitéit awer wënscht, datt deen een oder anere Softdrink net an hirer Kantin vu Restopolis ugebuede gi soll, kann eng Demande un de Ministère fir Educatioun, Kanner a Jugend gestallt ginn, fir dat Gedrénks net ze verkafen. An all deene Schoulen, déi sou eng Demande gemaach hunn, gëtt keng Cola an/oder Limonad méi verkaf.

Restopolis hat viru ville Jore mat dem Verkaf vu Softdrinks an all senge Kantinnen opgehalen, allerdéngs huet dës Moossnam net dat gewënschte Resultat bruecht. Amplaz datt sech d'Gäscht fir Waasser entscheet hunn, hu si Softdrinks ausserhalb vun de Schoulstrukture kaf a mat an d'Schoul bruecht, wat dee ganz negativen Effekt hat, datt déi eidel Softdrinksfläschchen herno an den ëffentlechen Dreckskeische vum de Schoulen entsuergt gi sinn a sou d'Quantitéit vun dem Offall massiv an d'Luucht gaangen ass. Saitdeem setzt Restopolis a senge Kantinnen net méi op Verbuet, mä op Sensibiliséierung an Informatioun. Duerch hir Sensibiliséierungscampagne "Rethink your drink" an eidel Softdrinksfläsche mat Zockerwierfelen, déi an der Distributioun vun de Kantine stinn, gëtt de Gaascht iwwert all d'Gefore duerch de Konsum vu Softdrinks informéiert, behält awer de Choix, ob hien ee Softdrink bestellt oder sech gratis Waasser aus dem Krou hält. Des Weidere stinn an de Restopolis-Kantinnen d'Fläsche mat Mineralwaasser an dem Bléckfeld vun de Gäscht an d'Softdrinks méi déif.



4. Op wéi ee Montant schätzt de Staat d'Ausgabe vun der Krankekeess all Joers fir d'Behandlung vu Krankheeten, déi an direktem Zesummenhang mat ze héijem Zockerkonsum stinn, wéi zum Beispill Typ-2-Diabetes?

Dee Lien kann net gemaach gi well den Zockerkonsum net alleng an och net ëmmer direkt an Zesummenhang mat enger Krankheet steet, och net mat enger Typ-2 Diabetes Erkrankung. Niewer dem Zockerkonsum spillen souwuel déi ganz Ernährung, wéi och d'Beweegung an en allgemenge gesonde Liewensstil eng wichteg Roll.

5. Wéi huet d'Zuel vun de Länner, déi iwwert eng Zockersteuer verfügen, zënter 2017 evoluéiert a wéi eng Resultater goufen an dëse Länner domat erreicht?

D'Regierung féiert keng Lëscht vu Länner, déi eng sougenannten Zockersteuer agefouert hunn oder drun denken, esou eng Steuer anzeféieren. Zu Lëtzebuerg ass och net geplangt esou eng Steuer anzeféieren.

Lëtzebuerg, den 16. August 2024

D'Ministesch fir Gesondheet
a sozial Sécherheet
(s.) Martine Deprez